



**KEMENTERIAN PERTANIAN DAN KETERJAMINAN MAKANAN**

***Ministry of Agriculture and Food Security***

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan

62624 PUTRAJAYA,

MALAYSIA

No. Telefon : 03-8000 8000

No. Faks : 03-8888 6020

Laman Web : [www.kpk.gov.my](http://www.kpk.gov.my)

---

## **SIARAN MEDIA**

### **PENGILANG BERAS DIJATUHI HUKUMAN ATAS DUA KESALAHAN BERKAITAN URUS NIAGA BERAS**

**ALOR SETAR, 17 JANUARI 2024** – Mahkamah Majistret Yan, Kedah pada 15 Januari 2024 telah menjatuhkan hukuman denda berjumlah RM12,000.00 terhadap Kilang Beras Seng Wor Sdn. Bhd. selepas mengaku bersalah ke atas dua (2) kesalahan iaitu menjual 250 kilogram beras gred hancur kepada pihak tidak berlesen dan kesalahan perselisihan kuantiti beras hancur pada rekod berbanding stok fizikal dalam milikan sebanyak 10,593.70 kilogram.

Pada 7 Oktober 2023, *Task Force* Khas Bersepadu OP BPT melalui sepasukan Pegawai Penguatkuasa Kawalselia Padi dan Beras (KPB) Negeri Kedah bertindak membuat pemeriksaan stok beras di premis perniagaan Kilang Beras Seng Wor Sdn. Bhd. di Kota Sarang Semut, Kota Setar, Kedah. Tindakan penguatkuasaan ini dijalankan hasil daripada maklumat orang awam. Hasil pemeriksaan mendapati kilang berkenaan telah menjual sebanyak 5 guni berisi beras gred hancur berjumlah 250 kilogram kepada pihak yang tidak memiliki lesen pada 24 September 2023. Pemeriksaan yang dijalankan juga mendapati terdapat perselisihan kuantiti beras hancur dalam milikan berbanding penyata rekod stok yang diberikan oleh pengilang. Dalam perkara ini, pihak KPB Negeri Kedah telah bertindak merampas 10,593.70 kilogram beras hancur berkenaan.

Hasil siasatan mendapati kilang itu telah melakukan dua (2) kesalahan. Kesalahan pertama adalah di bawah Peraturan 9(1)(b) Peraturan-Peraturan Kawalan Padi dan Beras (Pelesenan Pemborong dan Peruncit) 1996 [PU(A) 624], iaitu tidak boleh menjual beras kepada mana-mana orang kecuali kepada pemegang Lesen Borong yang bukannya pengilang beras, pemegang lesen runcit, mana-mana orang bagi maksud pengilangan atau katering dan mana-mana pembekal beras di bawah kontrak. Bagi kesalahan kedua, terdapat perselisihan kuantiti beras dengan maklumat yang diberikan melalui Penyata Deklarasi Stok Beras Dalam Milik/Kawalan di bawah Seksyen 7(1)(a). Siasatan mendapati telah berlaku pelanggaran di bawah Seksyen 8(2) Akta Kawalan Padi dan Beras 1994 [Akta 522] dan boleh dihukum di bawah Seksyen 22(2) Akta yang sama.

Mahkamah telah menjatuhkan hukuman denda sebanyak RM7,000.00 bagi pertuduhan pertama dan RM5,000.00 bagi pertuduhan kedua ke atas Kilang Beras Seng Wor Sdn. Bhd. dan hasil rampasan bernilai RM25,000.00 dijadikan hasil kerajaan. Pendakwaan dikendalikan oleh Pegawai Pendakwaan KPB.

Bekalan beras tempatan di pasaran sejak beberapa bulan lepas telah mengalami gangguan susulan peningkatan permintaan terhadap beras putih tempatan. Tindakan tidak bertanggungjawab oleh pihak pengilang telah memberi kesan kepada keberadaan bekalan beras di pasaran. Bagi memastikan bekalan beras tempatan stabil di pasaran, Kementerian Pertanian dan Keterjaminan Makanan (KPKM) giat melaksanakan inisiatif bagi meningkatkan pengeluaran hasil padi di samping melaksanakan aktiviti penguatkuasaan di sepanjang rantai bekalan padi dan beras dalam negara.

KPKM memberi peringatan kepada pengilang padi, pemborong dan peruncit beras selaku pemegang lesen supaya mematuhi peruntukan perundangan di bawah Akta Kawalan Padi dan Beras 1994 [Akta 522] dan Peraturan-Peraturan di bawahnya. Tindakan penguatkuasaan yang tegas akan diambil sekiranya pemegang lesen gagal mematuhinya.

Orang ramai yang mempunyai maklumat atau aduan mengenai aktiviti berkaitan padi dan beras yang menyalahi undang-undang dinasihatkan supaya melaporkan kepada pihak KPB melalui saluran yang disediakan seperti berikut:

- i. Portal Aduan KPB: <https://skpb.kpkm.gov.my/adu>
- ii. E-mel Rasmi : [aduankpb@kpkm.gov.my](mailto:aduankpb@kpkm.gov.my)
- iii. Hotline Ibu Pejabat KPB Putrajaya: 03-88701751/1748/1183

**KEMENTERIAN PERTANIAN DAN KETERJAMINAN MAKANAN**  
**17 JANUARI 2024**